

# Pekedai ura2 naik harga: Amaran Mahathir

Oleh RUHANIE AHMAD

**KUALA LUMPUR, Selasa** — Pemangku Perdana Menteri, Datuk Seri Dr. Mahathir Mohamad hari ini memberi amaran keras kepada pekilang, pengedar peruncit barang-barang keperluan harian supaya 'tidak menanggung di air keroh' dan menaikkan harga sewenang-wenangnya.

Kerajaan, katanya, akan bertindak tegas ke atas mereka yang cuba mengambil kesempatan dari keadaan sekarang.

Bahan asal dari Arkib  
Negara Malaysia

Datuk Seri Dr. Mahathir menegaskan demikian ketika mengulas rancangan peruncit di sini dan seluruh Selangor hendak menaikkan harga barang keperluan harian berikutan dari kenaikan 25 peratus kadar bayaran pengangkutan yang diumumkan oleh pengusaha-pengusaha lori baru-baru ini.

Para peruncit tersebut cuba menaikkan harga barang-barang keperluan sekurang-kurangnya 25% mulai pertengahan bulan ini.

Kebanyakan peruncit tersebut terdiri ahli beberapa Persatuan Perniagaan China di sini.

## Kesempatan

"Kerajaan tidak akan membiarkan sesiapa saja mengambil kesempatan dari keadaan sekarang. Kerajaan juga tidak akan mengizinkan kenaikan harga tanpa alasan munasabah.

"Adalah salah bagi siapa yang terlibat dengan penjualan dan pengedaran barang keperluan menganggap mereka boleh mengambil kesempatan dan menaikkan harga barang tersebut," katanya serius.

Katanya lagi, Kerajaan sentiasa memandang berat akan percubaan menaikkan harga barang-barang keperluan harian.

Pendirian Kerajaan itu adalah selaras dengan hasratnya hendak membendung kenaikan harga yang akan membeban dan menyusahkan rakyat, terutamanya golongan berpendapatan rendah.

Sekarang Kerajaan mengeluarkan subsidi ke atas beberapa jenis barang-barang keperluan \$1,000 juta setahun. Sebahagian besar subsidi itu adalah untuk petroleum, khususnya diesel dan petrol.

"Oleh itu Kerajaan tidak sekali-kali mengizinkan sesiapa saja yang cuba mengambil kesempatan mendapatkan untung dari wujudnya subsidi tersebut," tegas Datuk Seri Dr. Mahathir.

Beliau selanjutnya melahirkan pertanyaan mengapakah pengusaha-pengusaha lori menaikkan kadar bayaran pengangkutan mereka setinggi 25 peratus.

"Mengapa pula pengedar dan peruncit juga mahu menaikkan harga menurut kadar tersebut," katanya.

Pemangku Perdana Menteri memberitahu beliau akan ke Sarawak esok menghadiri Persidangan Raja-Raja yang diadakan di negeri tersebut.